

你是啥？

兄弟姊妹，請 lín tiòh 敬重 hiah-ê tī in 中間 teh 勞苦工作，mā 是主所揀選來 kā lín 指導 kah 勸勉 ê 人。為 tiòh in teh 做 ê 工作，lín tiòh 用 siōng 大 ê 疼心 kah 敬意來對待 in。Lín 大家 mā tiòh 和睦做伙。(《全民台語聖經》帖撒羅尼迦前書 5：12-13)

咱 án 怎定義咱家己？咱 kiám-chhái 會回答講：「我是一個學校 ê 老師」，á 是「我是一個農夫」，á 是「我退休 ā」。Á 是咱 kiám-chhái 會講：「我是人 ê bó」，á 是「一個喬治亞州 ê 人」，á 是「一個浸信會會友。」咱 ê 目的是 beh 講：「我是一個特別 ê 人，有某種才能、興趣 kah 承諾。」

總是，請注意，所有 chiah-ê 自我定義 lóng kā 咱用某種方式 kah 其他 ê 人縛做伙；成做同伴 á 是一 koá 傑出團體體面 ê 一部分。咱無必要想 beh 自誇，m̄-koh，咱往往 mā 無想 beh kā 咱家己 kah hiah-ê 無真值得欽佩 ê 人，像講 sàⁿ-chhiah、無家可歸，á 是關監 ê 人牽連做伙。當耶穌向祂拿撒勒 ê 鄉親描述家己 ê 時，祂講：「我是 hit-ê 來 beh 報好消息 hō sàⁿ-chhiah 人，koh 對囚犯宣布自由，hō chheⁿ-mê-ê koh 再看見，以及 hō 受壓迫 ê 得 tiòh tháu 放 ê 人。」

我會感覺 pháⁿ 勢，當我講：「我是 teh 幫助博愛之家(Habitat for Humanity) 起造厝宅 ê 人」，á 是「我是 tī 我 ê 教會 teh 教聖經課程 ê 人。」Chiah-ê tãi-chì kiám-chhái lóng 是事實，m̄-koh，咱 siōng 好是用適當 ê 方式來 hō 人知影：「我是基督徒」。事實上，這是執行大使命 ê 必要部分：宣布家己是耶穌基督 ê 跟 tòe 者，而且說明為啥物咱會做 chit-ê 承諾。

咱 ê 挑戰是 tiòh 用啥物方法 kā chit 兩項 tãi-chì 結合做伙：描述咱 ê 世俗生活，m̄-koh mā 承認咱信耶穌。Siōng 好 ê 方法 kiám-chhái 是通過咱 ê 行動 kah 咱生活優先考慮 ê tãi-chì。

當保羅叫教會會友尊敬獻身 ê 人 ê 時，伊有確認 chit-ê 方法，因為 in 有奉基督 ê 名認真 teh 事奉其他 ê 人。Án-ne，he tòh 是教會會友 ê 好目標，你 kám 無 án-ne 想？

祈禱：上主 ah，我感謝祢賜我 chit 節聖經，而且我求祢擴展我 ê 心，thang hō 我有可能接受 koh 靈活應用 chiah-ê 話 tī 我 ê 身上。求祢 hō 我學習 án 怎來 kā 我 ê 世俗 kah 屬靈生活融合做伙。靠基督 ê 名。阿們。

(1995.06.04)